

四庫全書

集部

欽定四庫全書

集部
密菴集卷二

詳校官太僕寺少卿臣李廷欽

中書臣劉源溥覆勘

膳錄舉人臣秦櫟

膳錄貢生臣趙珍

欽定四庫全書

集部六

提要

密庵集八卷

別集類五明

臣等謹案密庵集八卷明謝肅撰肅字原功
上虞人元至正末張士誠據吳肅慨然欲見
宰相獻偃兵息民之策卒無所遇歸隱于越
洪武中舉明經授福建按察僉事以事被逮
下獄死明史藝文志焦竑國史經籍志黃虞

稷千頃堂書目俱載肅密庵集十卷而傳本
久稀藏書家罕著於錄惟永樂大典中所收
肅詩文頗夥其時肅歿未久而姚廣孝等已
錄其遺集與古人同列知當日即重其文矣
朱彛尊靜志居詩話稱肅初謁貢師泰於吳
山仰高亭時貢方奉詔漕閩廣粟當泛舟太
海因與同載至海昌留居州北執經問難凡
一詩之出一文之就折衷論議必當于理乃

已是肅之學問淵源實出師秦觀集中題天
風海濤亭詩序云用先師尚書貢公玩齋所
詠詩一句為起以仰止于公又師秦遺集亦
肅所刊行均惓惓不忘其本故所作古文詞
格律具有法程其在濰州寄人一詩載所與
同徵修禮書者有張紳楊翮等十人之名為
明史禮志所未及又送行人蔡天英頒琉球
國王印寶一詩考之明史外國傳但有賜中

山山南山北三王鍍金銀印一事而不言曾
遣行人凡此之類於考史尤有所裨蓋謹採
掇編次釐為八卷又戴良原序二首別見九
靈集中今並取弁簡端以畧還其舊焉乾隆
四十六年九月恭校上

總纂官臣紀昀臣陸錫熊臣孫士毅

總校官臣陸費墀

原序

文主於氣而氣之所充非本於學不可也六經而下以
文雄世者稱孟軻氏韓愈氏孟軻氏曰我善養吾浩然
之氣韓愈氏曰氣勝則言之短長聲之高下皆宜然孟
軻氏之養氣則既始之以知言而韓愈氏之氣盛亦惟
三代兩漢之書是觀聖人之志是存耳文以氣為主氣
由學以充見之二氏可考而知也後之學者乃或不是
之求方貴華尚采粉澤以為工道密以為能吁亦末矣

是故有見於此而思務去之者豈不謂之有志之士乎
若吾友謝君原功斯為有志之士矣原功自幼強記捷
識敏於學問比壯經史百家皆搜抉摛擢毫分縷解積
之既久淵泓湧溢浩乎其沛然矣嘗一試浙江鄉闈不
利輒謝絕場屋抱其遺經見尚書貢公於吳山公一見
即待以奇士已而同泛大海相與朝夕論辨一意古學
刮摩淬礪訖為聞人後稍典教吳中從軍淮右以應聘
藩維而浮沉常調者數載迨疆土內附例徙南京既與

攷禮樂而達官貴人有強致原功於遠郡者於是踰江
渡河北走齊魯登泰山臨淄水而文氣益壯奈何不一
二年復以踈雋不羈棄去平生抱負百不一試而其志
之可見者獨文而已原功之文肖其為人其立論閎以
正其書事簡以悉其序記銘贊雅健而奇警其詩歌彬
蔚而穠麗庶幾傑出一時流輩無敢與並者原功既東
還故里攜其所著密庵稿若干卷授予曰吾所與游而
久者誰歟惟是文章宜有序敢以請於子予不得辭謹

為論次其學之有得孟韓者書于簡首使世知原功之
文非徒粉澤適密之是務而其傑出一時者盖由有氣
以充之而又能本之以學也原功會稽之上虞人名肅
字原功密庵乃別號也故以題其稿云金華戴良序

又序

余友謝先生原功天下之豪俊人也居於越之鄙越人
無少長望見原功皆畏服始原功壯時閉影讀書期以
事功見于世當元之季抱其所學試藝江浙鄉闈不即

售僅取一校官以去後值兵起浮沉藩鎮者久之入國
朝嘗被簡拔入禮局與太常諸儒同攷禮繼為忌者所
不容遂出贊郡政千里外又以胥鋪見黜困而歸原功
既不偶漠然無所向聞西北山水之雄壯其山則有泰
岱恒嶽太行之崛崒其水則有江淮沔濟汝潁之汹涌
伏羲堯舜禹湯文武之故都孔顏鄒孟之故里與夫戰
國王侯將相之丘墓咸在焉於是由金陵走濟南走太
原盤桓吳楚齊魯燕趙晉魏之郊感今懷古一發於聲

詩當其登高臨下或藉草坐卧或劇飲大醉必放歌朗吟以適一時之樂何其壯也原功之詩五言古律則本之漢魏歌行則遵李杜近體則祖少陵六朝晚唐無論焉他若山川之離合土地之沿革人物之廢興可以正史策之訛謬補志書之缺畧者則又等前數人而上之紀行之詩而至原功可謂盛矣夫詩之紀行自少陵秦蜀以後作者豈無其人然皆循守故轍一唱百隨求其自出新意以古為則者曾不多見而原功獨卓卓如是

豈其學問之富使然歟原功之學富矣至其為文尤高出時輩沛然有古作者之遺風昔司馬子長徧游名山川而文氣益盛原功以既富之學沛然之文而加之壯游孟子所謂莫之禦者也則其所恃以不朽者徒詩乎哉而余尤切切云爾者蓋見原功於一聲律之微亦無不盡心焉爾嗟夫原功年向老平生自信曾不及少試是以人亦無所因以窺原功之所至若即是詩攷其筆力之雄健胷次之魁廓亦足以知其志之有在矣金華

戴良序

欽定四庫全書

密庵集卷一

明 謝肅 撰

五言古詩

門有車馬客行送倪季芳

門有車馬客意氣何桓桓
既持倚天劍復戴切雲冠
自云報恩子不畏行路難
有能遇國士一語披肺肝
而我不能解事抱瑟齊門彈
知己諒難得盛年嗟易闌
拓落走吳楚與子聊遊盤
懷才既無補竊祿非所懽
念彼古豪

俊豈必卑小官逢時展經濟乃使蒼生安之子素倜儻
此道期相教明當別我去贈以琴琅玕

河陰渡

朝發武陟城夕宿河陰渡平原鬱蒼蒼蔓草已多露展
我素輶輶偃息並厓樹洪濤與風會若迅雷怒撥余
江海士止逝隨所過一葦苟可航濟險亦奚懼所念形
影單恒餓在長路中田宜無稼不受一飯顧引領望故
鄉已復星漢曙宣尼川上歎使我獲深悟

飲龍頭鎮

馬上見晨月堠路行遙迤遂入龍頭憩沙洲帶蒲荷榆
柳蔭華屋正暑涼颺多怡然逢故老邀我還其家大兒
擊燕筑小兒倡吳歌黍酒勸客飲勿辭令顏酡維昔至
正末日夜憂干戈太平今在斯白髮已髣髴若復不為
樂徒死歸山阿其言感余內壯志良蹉跎書劍兩無就
又不脫虛羅邂逅接觴酌念報當如何長揖登途去華
峯碧崖差

謁伏生祠

鷄鳴起冠帶驅馬出鄒邑敬謁伏生祠堂陞遐難及上
古帝王書冥心事時習惜哉乖世用荏苒餘九十孰知
天慙遺絕學賴之立流傳廿八篇奧義誠乃急區區梅
內史所上何雜集古文反平易今文獨艱澁冥茫千載
疑欲剖空汲汲沉復治道微斷簡誰為緝問生寂無言
再拜重忤悒

榮陽

濟水出王屋既伏仍流行大河不能限東南溢為滎滎
陽古號邑鼎峙京索城虎牢足形勝河汴揚濁清晉楚
既迭霸劉項復兵爭成皋口宜守教倉粟方盈創業雖
足賴匪德何由成東都紹炎祚不席地勢興山川失險
阻天地載清寧昭代御宇內茲土麗神京人民日已衆
擊壤歌隆平焉知客游士念此愧深情願為東飛鶴一
舉還蓬瀛

遊蘭芳山

層峯上回盤承虛閔深塢外周崢嶸石中蘊開闢土磴
道亘煙嵐仙居絕雲雨鑿井貯泉沉泥竈並厓阻冥范
紫金丹雕煥青蓮宇塔歌藤薜綿庭寂苔蘚古甚念雙
巨杉支天象修柱雖依布金地終莫遁斤斧人生矧多
難天伐何可數願棲岩蘿幽聊結麋鹿伍曙海看日生
夕江窺月吐霽雪照百樓涼颭蕩天姥撫化周四時餐
霞契真侶神明一以超逍遙自遐舉寄謝空學流胡為
坐如堵

送楊知州赴吳江

五湖帶三江形勢東南雄
名州控其會萬井烟濤中
魚鰕足鮮食況乃抗稻充
民生亦云遂歉歲稀困窮
所憂鯨鯢作赤手難折衝
至今邊岸蕩濁浪吹陰風
誰能麾壯士據險浮艤腫
犀甲習水戰一掃妖氛空
楊侯任州伯偉畧蟠寄胷
下當理民事上當恢武功

三良冢

尚父亮周室夷吾翼齊侯
尊王樹霸烈治國貽陰謀
奕

葉擅强大英靈萃營丘田疆既虎躍古冶亦龍游公孫
復隼魫勇智識相侔訂謨共幙幄肆伐參戈矛社稷有
內安封城無外憂我君豐豫暇顧盼倏懷疑叶萋菲錦
終就黑白蠅何稠同為二桃死連閔三冢幽蒼涼蕩陰
里行李去復留事往義彌著世殊感焉休過臺蔓草碧
牛山暮烟浮獨念泉下人泣然雙涕流

蕭何冢

靡靡衢路遙行轅駐陽武崇丘積蔓草云莽蕭何所念

此人中傑張韓乃其伍榮名不足矜所貴忠事主入關
當王之背約自西楚勸王都漢中視死誠孰愈養民以
致賢立國誰敢侮三秦良易定三河不難取薦信登將
壇滅羽向垓下帝業一以成元勲著千古蕭蕭白楊風
日暮振天宇悲吟畫一歌欲去重延佇

遊石室

在海州

昨發漣水陽今息眇山陰低徊訪石室上有桃樹林芳
華麗海日惠風拂塵襟相見芙蓉主琅然方嘯吟暢飲

揮玉箏哀彈進胡琴自適天下樂誰知匪荒淫安期蘊
長策中散識雅音舉世既莫喻乃果仙遊心芙蓉而猶
爾靈跡留至今恨不駕白鳳逍遙以追尋

鳳凰山

鳳凰不世出覽德乃遊翔虞庭既來儀亦復鳴周周云
何太谷山而以名鳳凰山岑若竊蕭佳氣凌蒼蒼一朝
有靈鳥至自蓬萊鄉厥聲應律呂其羽爛文章雖無醴
泉湧飲之甘且香豈乏梧桐生莽莽當朝陽一枝暫棲

托含意在八荒奈何鷄鷺羣叫嘯方捨攘高舉戾雲漢
與世邈相忘

青州府學竊感聖人聞韶之事

魯叟昔在齊君臣豈知敬何期萬世後王禮祀元聖元
聖去我邈韶音已聞聽厚味諒可忘至樂誠無竟君哉
虞舜氏道德一何盛作樂化天下百王莫能競於心得
真契無味斯有命從容攝相間暫使禮樂正去魯因饋
女適衛還擊磬徒懷經濟具可奈兄弟政文王雖既歿

周公當復夢

叶莫浪

不見鳳鳥來已矣何所傷

叶式亮

六經

垂訓明

叶謨郎

雒雒峨宮牆瞻仰願沒齒庶以希顏生

叶師

莊

長平

引軛方上牛參旂正南舉行行堠路明忽在長平聚跣
躡念衰韓不得守茲土嫁禍于趙國移師與秦拒趙卒
一以坑秦兵肆攻取惜哉廉將軍制敵中見沮遂令銳
頭兒殘暴踰猛虎善戰服上刑賜劍非弱主咨爾頭顱

山委命復何語

出膠河送別劉用章

齊民猶未蘇羈官足長喟何意并州士軒車遠相慰旬
餘共食眠慷慨聞計議顧余非俊傑俯仰期不愧探道
固夙心徇祿非素志未還隴畝耕忽值時事異零落遂
至今非君孰能媚愴焉喪亂餘念舊如夢寐親交存幾
人置酒當輒醉北海雪掩晨東萊草生地出餞膠水西
踟躕悵分轡相望雖匪遙嘉會難再冀願言各自修毋

獨簡書畏

淄川濯纓

淄川何悠悠東北赴滄海輕舟若可楫不去復何待青
青波上萍演漾誰得採鑿鑿淵底石靜閱人代改浮沉
良自由進退獨惟罪白日麗中天奄忽生遠靄聊且濯
塵纓翻然落深海極溺念神禹相去已千載登碕睇我
髮壯氣猶魁壘安得赤鯨騎仙洲拾蘭茝

夷白先生令咏庭樹喜鵲

清風舒旭日雙鵲鳴相和不惜辭野木唯願巢庭柯主
人誠愛物瓊林亦婆娑高樓有垂蔭低濯無張羅飢啄
丹丘粟渴飲玉池波養此侯印質傷彼月樹歌銜梁非
偶爾送喜夫如何夫人已詠德織女將填河

伏羲陵

兕丘何隆隆宰木方蔽芾皇羲不可作封樹表萬世緬
惟開闢初人獸無以異雖有結繩政禮法殊未制自非
神聖興孰發天地秘人文一以宣三才道斯備立極盡

金少府集卷之二
卷一
恒性稽疑示精意大和熏八紘獨守君師位羣帝承治
統百王賴書契惜哉風氣漓復古終莫逮曰余昧先天
玩象冀深詣何能窮蘊奧一理貫萬彙茲焉拜古陵時
達酬素志願求五十著決彼天下事

謁伯夷叔齊廟

孤山起千仞不與衆峯儼飛甍冠其椒中列夷齊位爰
從秦漢來時節修祀事此鄉嘗過化仰止宜不替何必
覩光儀始覺頑懦厲至此聖之清師表向百世讓國播

高風諫伐明大義餓死無所悔於仁得深詣精明一寸
心終古照天地云胡孤竺城雲暗遼水裔矧乃首陽山
豺虎正相噬三復采薇歌凭危獨流涕

圯上有懷張子房

沂水東悠悠踟躕立圯上固無黃石期留侯詎能忘留
侯本韓人五葉為輔相國亡思報秦購士椎博浪力誤
雖不覽意氣亦雄壯歛來蟄龍蛇舉世莫知鄉授書何
恠奇任挾誠調儻少年日以聚誓欲取金鏡叶邂逅隆

準公嘯咤後諸將關中奄席卷漢業知己創歸還佐橫
陽欲以韓興霸惜哉成見殺此意徒慨慷乃復從漢王
滅羽垓下帳平生韓兩仇反手咸掃蕩深衷寔在斯寵
祿非所望遂挾松子遊高風邈難伉余生千載下結想
常入夢叶其貌若美人偉畧不可尚

過高郵

方自越湖江厲馬趨海岱秦郵道所經撫事一長嘒乾
符失其握政弊民自潰羣雄相併吞中土正憔悴長弓

海陵來飛鏃頗堅銳遂令百萬師竟屈三五隊效順乃
天啟開藩制吳會干戈分四隣枉石矼當代運去不可
追戰死亦可悔豈復念姑蘇麋鹿遊已再曩余過茲城
薄從嫖姚征時事諒殊昔桑麥還青青悠悠覽社水流
血一何腥相見斷頭將雲旗揚窈冥

晉陽

節彼懸甕山晉水出其陟捍之湜方塘注之盈畎畝浩
浩汾河流東行何迤邐叔虞受封地汾晉環左右維城

屏宗周貽謀至孫子胡為封曲沃自使絕人紀兵戈日
强大創霸在重耳悼公紹餘烈王室暫寧止區區隋家
帝宮中極華侈於焉啓唐祚天運不可擬我來游冀方
斯境屢淹軌慷慨懷古心申章不能已

南山宴集

我在塵網中而有世外心逸步常獨往靜聽山水音矧
茲同懷客陵緬極窺臨振衣崇雲表洗耳清澗潯陽葩
霽芳氣嘉樹鬱繁陰縱浪流觴飲低回攀桂吟麗澤悅

來淺考槃樂何深窮棲謹素履達宦輕華簪薰風自南
至曾汎有虞琴餘韻已寥閬憂懷良莫任

己酉九日瓜洲次陶靖節己酉九日韻

廣陵值佳節游子欣慨交閒情日已適短髮秋自凋俯
愧魚龍蟄仰瞻鴻鴈高落木際遙岸微雲翳層霄豈無
沉尊醪薄慰行路勞采菊芳洲上獨酌當金焦酣來登
遠游悵望柴桑陶達人愛重九從古非一朝

勉任守禮進學

良玉不易求躋險崑崙上明珠諒難采杳渺沒瀛浪何
如探大道廓若天曠蕩驅車行弗息聖域將可望人生
孰不學此心在無放神明湛中存妙用能曲暢苟昧精
一功利欲紛作恙靈臺日已蕪出入迷所嚮水游體習
坎雷行法无妄德業一以成吾中胡不廣嗟哉媚學子
此道當勉強為山或自虧白首徒悲悵

相思嶺

暮次大田驛朝越相思嶺嶺上奚所思思君善刑賞賞

功固有秩刑惡良有等願體欽恤意治平庶無枉泉南
七閩地使節自茲往讞獄在詳明吐論當峻整微風振
榕林仰睇天宇迥於心得真契凝光何煥炳

過相思嶺因而有作

相思復相思與子分袂久豈無同心結十手不能剖願
一見華容託夢千里道回風拂中帷暫覲於杳渺閩山
何巍巍浙水何浩浩悠悠遠別情徒惜芳年老不贈連
理枝但贈宜男草

悲古墓

西出萊城門原陸何渺渺古墓如星羅威紆帶長道行人日往來焉念窀穸鴟鴞鳴白楊孤兔眠蔓草零落忽在斯長夜終不曉貴賤昔分殊今復誰醜好聖賢諒拔萃盛德擬穹昊既歿常若生希慕苦不早流光疾於駟始壯歛已老溘焉朝露晞微命安可保自非立修名徒勞悵懷抱

過營丘

今臨淄縣

幽薊既分燕曲阜亦封魯全齊周四履王室資夾輔眷
言東大藩鎮靖自前古左奠瀛海翻右據泰山阻匪直
形勝會曾是賢哲處丹書藏太公內政修仲父田單復
社稷魯連委圭組高風邈難攀奇計疇為舉伯王事復
湮末俗變風土矧乃鄒孟氏特達王道語諒哉見閭迂
未可干世主皇明御宇宙文教戢威武七篇仁義存於
治非小補伊余餐至言無餒方自許重經紆轍地瞻仰
極延佇雪宮有叢基畫邑無遺堵耿耿欽聖心中章莫

能抒

天井關

昨發太行驛今登天井關關上一何異宛若城郭環晉
河繚其下羊腸上回盤松栢被厓谷迅飈淒以寒斂社
東北顧千里接岡巒雲霞屢變滅可以縱遐觀壯哉河
北脊元氣結厚坤都邑多附麗熙熙生齒繁宣尼此迂
轍宮牆尚言言漢帝猶巡幸雲中旌幟翻如何曹孟德
乃有摧輪歡脩坂雖詰曲徐行豈云艱日暮山氣肅好

衣良苦單努力驅車去眄彼龍門山

北窓閒卧

長夜畏溽暑閒來北窓卧樹木有繁陰矧乃涼風過快
哉一室間清謠欲誰和萬物何必小天地何必大苟能
順其然一氣終不挫逍遙陶靖節微官或求做李斯相
秦國黃夫意悲吃悠然望白雲孰可回我駕

登鄒平縣城

離離原黍茂蔚蔚栢葉青鶯遷必喬林鹿食惟野草生

物咸得性憚人正飄零解鞍憩鄒邑落日登故城依宗
雖峻極濟水殊未清東陵死盜跖遺突浼山靈於陵棲
仲子小廉何足稱臨眺轉哀鬱何以慰孤征伏生夙所
慕華寢翔林垆

登昌邑城

漢季昔崩潰羣盜紛縱橫黃巾雖已破餘孽尚蚊虻
落孔北海坐困都昌城苟非劉平原何以釋圍兵始覺
天下士乃識蓋世英求援豈不忤民社安可輕惜哉青

復陷竟負知人明守郡既無補升朝亦何成徒深奸桀
忌巢壞卵亦傾游目漢廷內志節成足經寧以剛直折
不為圓曲生千秋陟遺堞連雲想高旌悽矣欽賢歎曷
由承一觥

朱娥詠

上虞人朱回之女隣警朱頽欲殺其祖母娥年十歲力挽頽衣脫母於難娥被

害

稚松生澗底已擢凌寒姿春鳥出巢去反哺還高枝何
況十歲女所稟真英奇至孝自天啓利害焉足移臨難

顧代母白刃正差差奮身當刃刺揮手挽讐衣被血死
瞠視尚恐追殺之母難一以脫遂達朝廷知詔書卹其
家鄉里建其祠亦復附曹娥降集清江湄丹青著往事
宋史不吾欺至今顏寢在四壁苔蘚滋巔繁既莫薦庶
士徒嗟咨高山何漠漠溪流亦漣漪魂歸夜月皎樹聲
淒以悲疇能復廟祀萬世猶一時

密菴集卷一

密菴集卷一考證

第四頁前七行 三良冢按三良子車氏三子奄息仲
行鍼虎也今詩內說公孫古治田疆應是三士冢梁
父吟所謂二桃殺三士也據齊乘冢在青州臨淄縣
南一里永樂大典因三良字遂編入秦三良條內尤
為舛訛今題目姑仍其舊

[illegible]

欽定四庫全書

密庵集卷二

明 謝肅 撰

七言古詩

揚子江值風

金山一舸沿潮落，楊樹沙高大風作。
掀濤播浪舞陽侯，裂石漂沙驅海若。
日光陰沉雨氣昏，長魚吞噬穹龜奔。
恍若龍蛇起平陸，疾雷急雨喧乾坤。
衆工爭先沉鐵釘，前後覆舟號哭競。
蒼茫神鬼紛憂摩，咫尺龜鼉爭性命。

此時抱姪抱樓中乘興欲往蓬萊宮同舟相顧氣沮喪
問我何獨神冲融我今行年四十五足跡周流半天下
寸心湛如江水白生死非天定誰主狂飈忽息狂瀾平
水天一色涵澄明吳歌杳眇雙櫓輕君山翠落江陰城
回望中洲白鳥橫

題墨竹

坡仙寫竹如寫字指端所出皆酒氣意態飛時若有神
風格老來還嫵媚鸞羣鴻爪沙水明鳳翥鸞翔山月霽

流傳戲墨在人間拂拭一枝看仔細

蓀溪別墅梅花盛開

白馬湖東歲云晏殘雪茅居俯林磴
邂逅南枝一點春
歛忽繁花千樹繁滿地崢嶸明月陰連空窈窕仙雲深
銀闕凝光何照耀蕊宮爽氣常蕭森悠悠物外清將別
淡淡琴中三弄歇漫將觴酌怡天和未怕笛聲吹石裂
青苔坐吟不灑掃風日清佳春正好却念逢春欲白頭
豈不令人思遠道廣陵開時明海曙天平折處橫龍門

絕艷迎人西子湖暗香隨馬八公村冶亭山寒歸夢短
城頭欲曙霜角斷飛花有意送行車倦客無聊經野館
自落三齊又二年不見玉面生暄妍非無紅紫紛作陣
轉覺涕淚如奔川花應笑我長漂蕩失脚真成落塵網
那知萬里得生還仍向故園追勝賞後時花落芳事闌
黃鳥陰成佳實繁食實者花足吾樂不妨靜寄東軒間

題永嘉山水圖

太初子來五湖示我永嘉山水圖洪濤積翠浮吾廬連

天鴈蕩森劒戟出海蒲門竦巖壑羅浮勢接步郎高盤
鬱千峰擁城郭瀑雨松陰晝杳冥銀牀瑤澗春寂寞紫
金丹就隱容成青雲梯高躡康樂容成已莫招康樂猶
可求不出西城步定向南亭遊眼中風物豈不好感歎
乍登池上樓薄霄既愧雪飛鴻棲川復乍淵潛虬池草
春生芳王澤下竭園禽變鳴芳佞人鼓舌縱學嵇康事
養生難附任公逃天伐悠悠往事付虛無誰復懷賢似
太初應愛五言真妙絕粲然朝日映芙蕖

題四馬圖

風吹細草沙場春忽看東絹落騏驎一匹前馳復回盼
二匹齊驅若飛電最後一匹奚官騎意態深沉日光眩
太平天廐粟如山此物飽食長年間玉臺閭闔遍游觀
五花滿身雲錦翻馬知汗血干戈底北伐南征千萬里
惠養之恩終未酬空負將軍託生死此圖乃是吳興寫
龍種權奇信無比嗚呼安得真致此萬歲千秋御天子
題汪資深所藏柯博士竹木

奎章閣高風日清閣中博士丹丘生幽篁古木妙揮洒
萬里不盡江南情洞庭山青湘水碧二妃遺廟無行跡
鷓鴣聲歇江雨殘天矯蛟龍影垂壁向來懷古良悠悠
零落此畫知誰收汪子得之宜寶玩三湘咫尺可神游
娥江送別圖歌贈縣丞達貫衛朝京

越山盤薄龍馬羣中有長江帶潮汐霆驅雪迸欲滔天
不沒曹娥廟前石鄉人共說曹娥孝天性生來不須教
邯鄲作詠已瑰奇中郎題碑尤絕妙流傳曾與阿瞞看

以孝移忠何所難丈夫乃不如女子況為同姓堪羞死
袞袞江波不盡流曹娥廟下泊行舟舟中美人顏半醉
紗帽烏鞵蒼玉佩浩歌淶水狎鳬鷺如此風流良可繪
豈不見美人昔日渡江來楊柳青青鶯亂啼美人今日
渡江去涼葉蕭蕭馬首西西上金陵天尺五青雲士友
多如雨莫忘江上別離時一玩新圖有所思

諭虎

并序

行將之泉南道出興化人云有猛獸傷人者

甚衆余未信薄暮而行果遇虎虎伏不敢動
良久將遁辭以諭之并示八閩官吏云

海風捲雨閩天晴攬轡晚出莆田城人言前山有猛虎
山雨乍歇溪水鳴郵亭傳舍去路永古榕茂荔連林青
極目人烟渺蕭瑟猛虎下吼如雷轟當前立馬一叱虎
卒肆意氣方崢嶸鐵籃焚火明奪晝照耀崖谷無潛形
頽然虎伏作卧石利爪鉅牙徒猙獰縱逢乳犬那敢搏
孰謂百獸猶震驚我職分符省風俗狐兔必掃豺狼逐

於菟咆躍最豪雄
啗人肥已當先戮林
颺泠泠山月落
伏虎欲行還躑躅
應愧尋常肆凶虐
深掩雙睛光煜煜
於菟於菟毋為狂
且聖人寧百姓汝
革必在驅烈士不
殺汝民害終未除
鸞我烏號重二石
拔我龍泉長三尺
截汝頭骨貫汝胃
汝皮我寢肉我食
汝雖後悔奚所益
不如蓄威武為帝
守九關見者皆畏
愛文采何斑斑

題等慈嵩岳青山白雲圖

昔遊河朔還歷覽
河南山山峰崢嶸
三十六峻極中天

是嵩山嵩岳之高出崑崙衡恒岱華咸歸尊下臨豫野
雄地六上應鎮宿昭天文太室闢其東半夜倒瞰滄海
日少室闢其西青晨起掛青蘿月風臺霧閣何岩薨翠
嵯丹谷隨逍遙王子鳳笙吹絕嶺焦師霓裳翻絳霄便
欲飛車往棲息笑倚天門觀八極閒雲來往作賓朋彼
此無心自相得惜哉此願未果遂徒看雲山落畫中山
青雲白倏遠近似聞蘭若來疎鐘八十禪公雙目炯一
瞬雲山皆幻境不須咫尺論萬里寸心要與天地並重

卷二
曰山有岳兮岳有雲雲為雨兮澤無垠雲不為雨兮舒卷
與乾坤禪公出處亦如此浩劫不隨名實存

題何參政所藏七賢圖

黃塵欲蔽日月明十年四海橫戈兵士風已隨習俗變
盡舍仁義談縱橫遂使棲棲七君子獨著儒服令人驚
胸中豈有經濟具眼底厭看龍蛇爭大山長谷便同往
不獨隱迹兼隱名由來貧賤足閒適豈必濁世干浮榮
兩生不來漢儀簡四老既去秦運傾寧知賢人慎出處

能與國家闢重輕況今作者已云七束帛合向丘園徵
君不見旁求良弼到版築一說能令商道興

題何德儒所藏顧周道水石圖

汙汙石下波鬱鬱波上林過橋仙客忽長嘯一鶴來自
蓬山岑蓬山岑不難至聊棲瀛海內自適滄洲意恍如
出巨石羣峰落影洪流碧又似泊金山迴潮激樹崩崖
間江淮風景真奇絕來往扁舟蔭清樾鳥飛魚泳醉吟
中回首茲游幾秋月虎頭子天機清剪彼水石來軒楹

使我一見氣崢嶸
龍蛇起陸雷
霆驚爾宜藏此畫
慎莫素壁掛光氣
一冲天超然便神化

望海圖

蓬萊岩嶢滄海上
玉作樓臺屹相向
共說神仙向此游
欲往從之隔弱流
弱流滔滔三萬里
極目蓬萊何處是
神仙有無良渺茫
若為寫向丹青裏
我家會稽山水鄉
蓬萊秀出東海旁
碧桃千樹開春晝
月閣萬尋凌昊蒼
長時飛鳥臨高頂
海色澄澄天與永
明月朝沉若水枝

赤日夜照扶桑影淋漓元氣任吸呼靈臺不動光湛如
直通天地有形外彼大瀛海皆潢汙此間即是神仙宅
不須涉海求靈跡秦皇漢武何太愚樓船方士無消息
淒涼往事已千年蓬萊猶作畫圖傳卷圖還君三復嘆
有鶴飛來橫九天

題王昭君圖

君不見漢道昌單于朝建章君不見漢道衰宮女嫁胡
兒胡漢和親自高帝以色媚人非遠計遂令留惠及子

孫內家又遣王昭君昭君本是巫山女預恐蛾眉妬雲
雨一入深宮長閉門好夢何曾著人主寧期粉繪誤嬋
娟玉殿辭君君始憐空抱哀絃寫憂怨風沙萬里向胡
天胡天蒼茫歲月促夫死羶城更從俗一寸良心不自
持安用紅顏美如玉畫裏傳看出塞時胡騎蕭蕭漢日
低即此堪為中國嘆不唯青塚草萋萋

射虎歌

伏勁弩操長矛壯士射虎南山陬虎應弦奔俄自踣目

晴猶燭爍不自追愆尤向來牙爪森鋸刃一怒能摧萬人陣飛行絕險忽焦崖石翻崩林木振朝餒吞鹿豕暮飢啣牛羊狼狐駭遁伏藏去却又拉人充飢腸天生萬物人最智虎雖恃力焉足畏是何頭骨能瑰奇毒矢穿之終莫避此時中矢勢益雄憑陵大叫吃層空風悲雲起助狂視卞馮不敢當其衝啞啞林鳥噪虎斃林西嶠黃質羅黑章奪目光炳耀哈爾虎兮何不從軒皇戰殺蚩尤綏萬方不然百獸同率舞使虞朝治道之彌光胡

乃山村肆饗口野窟畜圈皆踐蹂自矜威武非衆俾豈
想豪橫落人手君不見漢家飛將勇且獍彎弓射死不
射生又不見周公一去今幾代猛獸還胎中國害設陷
阱張闕機人始與獸角殘害紛相持虎欲食人人射虎
虎強人弱何以支以智鬪力斯獲之食虎肉兮寢虎皮
吁嗟壯士知為誰

龍女歌

并序

洪武元年三月三十日余在淮安城北滿浦

候舟將過安東因謁浦上龍女祠碑云龍者
東海淵聖王第三女儷蘇州柳大夫毅蘇有
廟此行祠也余異其事為龍女歌云

君不聞東海王三女才色少女良金冠玉佩雲霞裳超
忽六合陵三光四海託姻無與當畫開水府如人世寶
幄瓊筵照天地羣仙冉冉會佳期招得神夫柳家毅毅
也前身應是龍美髯廣額蒼顏容玩世亦與潛淵同時
來踴躍返初服天與伉儷還珠宮至今廟貌臨東海霧

閣雲牕事何在但使龍推澤物心天下祀之誠匪淫我
謁行祠向淮浦黯慘帷中靈欲語十日一風五日一雨
無衝波以危彼舟楫無大旱以敗彼禾黍嗟爾龍兮順
濟斯民千萬秋龍亦永赫厥靈於此州毋乖其道紛逢
尤

田橫固歌

田橫固在絕島上出青天之冥冥下臨滄海之浩浩迴
隔三齊絕兩淮洪濤日夜碎層嵯蛟龍所窟猿狖宅孰

謂英雄堪遁匿向來秦鹿走中原揮戈共逐烟塵昏漢
家得之只三傑五百賢士徒喧喧便應入海長不返猶
冀王侯斯可哂慨然決劒氣仍豪何面長安見隆準隆
準功成百戰餘鄼侯繫獄淮陰誅子房不託赤松去一
落猜忌寧全軀腹心爪牙今若此敵國爭衡定何似始
知夫子識先機萬古誰能無一死香風壁壘樹參天主
客遊魂俱可憐雖乏奇勲立當世且將高義垂千年

畫龍歌

海雲飛揚海水搖雲水挾風相怒號重淵無底龍睡熟
霹靂一聲凌九霄額鼻如山目如電生金鱗甲光芒見
倏忽變化那可攀驅江捲湖不作難天下豐年在霖雨
勺水歸潛還得所君不見丈夫用舍安有時吁嗟乎龍
應解知

題曹娥碑

并序

曹娥碑鑒定是晉王右軍書者其波磔與漢
蔡邕石經相似其結體與魏鍾繇同一軌轍

非右軍不能作也此帖四明黃繼民所藏余

作歌曰

婉孌曹氏女生長虞江濱乃父按歌能樂神逆濤江心
迎伍君偶然失脚成沉淪此時曹娥纔十四日夜哀號
動天地奮身躍入龍伯宮抱父屍出洪波中漢安年迄
元嘉始慘淡荒墳烟蔓裏度令深期民俗淳蕙肴椒漿
方祭誄誄文本是邯鄲作勒石垂光非溢美好辭玩賞
蔡中郎妙墨重揮王內史內史臨池示楷精出神入聖

由天成風格真淳樂毅論氣運逸邁黃庭經曹娥之碑
尤注意外足婉麗中堅貞疾遲偃仰各合度正側方圓
皆有程金錐畫沙鋒芒斂玉樹照水枝柯春秋風羣飛
鴻鴈叙夜天行列星宿明元常銘石猶隸體力命雅深
堪與比鴻都分法授於神筆勢去來同一軌流傳蕭梁
到李唐紛紛鑑者迷精光退之平時厭姿媚於此題識
何端莊乃知嗜好存奇古况兼孝烈如曹女碑陰隱語
亦了然可惜無言譏魏武魏武徒勞校色絲以孝移忠

忍不為獨覺遺風扇鄉里順孫孝子相追隨四明有逸
民示我碑一幅真若圭璋出羣玉書家徃徃無真識太
息還君須韞匱

和楊鐵崖次韻顧仲英春夜樂

回文織就春機紅郎君歸馬如飛龍香閨畫屏燒絳蠟
小几清箏響銀甲翠鳳纔炮白鹿烹鬱金美酒玉花甕
瓊杯漱灑妾為行氣酣笑絕縵胡纓大地有維天有柱
妾寧無心終事主還憐獨宿含吟婦燕子樓寒半簾雨

聽王郎彈琴

王郎十日不相見，今宵同宿流芳院。
試臨月沼坐彈琴，三四冰絃千萬變。
澹如夢澤水涵虛，奮如昆陽兵接戰。
落如巨石墮層崖，泛如飛絮飄晴岬。
大江當春波浪濶，深谷向秋樵唱遠。
雙雉和鳴野木高，孤猿獨嘯山月轉。
古文盤詰有艱澁，治朝雅頌無俚諠。
接輿狂歌感當世，屈子離騷賦幽怨。
安知虞帝鼓南薰，後來操變聲徒存。
淒涼凝響輟洙泗，激烈浩嘆興河汾。
河汾千載有賢孫。

洙泗遺音宜久聞猶將近調驚聾俗白雪巴歌誰解分
嗟余豈是知音者頗於律呂窮根源大樂之和天地同
舍汝彈琴吾與論

題王節婦卷

藁砧逝矣遺孤小白髮姑嫜方壽考彼蒼應念未亡人
孝節於吾願終保含悲黃鵠夜半鳴顧影青鸞鏡中老
百年耿耿一心存皦日當空照垣表

題朱元暉所藏趙魏公滾塵馬圖

吳興戲墨尤工馬卷軸風沙滿天下老壯駿羸皆入神
况乃長年病肥者窄衣尖帽唐奚官牽來鐵牡從天開
縱韁滾塵沙苑濶落花青草隨身翻既未得成戰功又
不令充立仗雄姿猛氣空逸羣飽食帶羈自多病嗚呼
此馬多病尚可醫此馬長命誰得知

琅邪臺

誰謂客行倦懷古方悠哉清風吹逸興飛上琅邪臺琅
邪臺臨東海碧西直嵩高暮霞赤半匡皎月分會稽別

岫凝雲低碣石天高地迴形勢雄越王曾駐旌旗紅九
霄宮榭瞰中國今日輦路無行蹤更有秦皇并漢武恣
意干戈滿天下豈不豪雄盖一時俯仰乾坤亦奚補偶
來觀日出即置黔黎三萬家也復祠四時萬八千里飛
龍車勞民耗國有如此中夏外夷咸怨嗟奈何二君不
覺寤欲火內烈無垠涯莫貴於天子六合今已一莫壽
於仙人更冀長生術樓船採藥泛滄溟桂館候神凌太
清紛紛方士有何驗去去童女無歸情幾度登臨徒騁

望縹緲蓬瀛隔烟浪銀闕珠宮不得游驪山茂陵那免
墓君不見金人去國淚滂沱頌德之銘石已磨琅邪臺
高差我

超然臺

東方千里遭旱蝗嗷嗷赤子何蒼忙使君適來守高密
快意豈復如錢塘錢塘絕勝高密好却背烟花行野草
雕鞍不穩畫船安脫粟易飢香稻飽繁華回首得蕭條
膏澤如流堪沃焦吾民無憂使君樂樂意超然誰最超

超然臺高北城上使君與民同眺望民愛使君如父母
千載牲醪不能忘昔我讀公文今我登公臺臺前風景
發人興再拜公像還低徊西瞻穆陵關東俯瑯琊島勃
海汪洋碣石孤常山欽崙馬耳小維淄流水更悠悠嘆
息前人都已休唯有廬敖挾仙侶至今來往鑪峰遊因
招羨門子便約安期輩嵯峨切雲冠縹緲凌風珮紛然
為我集臺端白日連空旌節寒紫霞深盃和石髓如瓜
大棗行金盤就中一翁稱地主調笑羣仙迭歌舞玉壺

天開俄頃間碧桃春融千萬古我幸承清宴妙訣從此
傳會使日輪生月窟神明無處不超然

將還滎陽留別

紫簾却寒碧香繞銀燈結花金粟小主人捧酒起勸賓
離別長多會長少明日騎驢鄭圃東白沙黃葉滿林風
知君此際能相憶笑指燈花映酒紅

虞美人歌

井序

余嘗讀史至西楚霸王項羽所作垓下帳中

歌知其深愛虞美人及騅馬故騅馬尚不忍
殺况美人乎而世言羽敗垓下美人恐為漢
軍得以劍自刎死然此事馬班皆弗載豈偶
遺之亦難明矣曩余從戎定遠過美人墓父
老為余言美人從羽自垓下潰圍渡淮漢軍
且追及美人乃自刎死此其處也是則美人
詎乏古烈婦風哉及過宿遷美人鄉也以其
有徇主之節而祠焉已以徵父老之言益信

蓋事固常有不幸者如美人徒以羽殘暴失
國人惡道之亦使美人之節不白於天下余
甚悲之故作是詩於以詠歌美人之遺事云

美人已為英雄死鄉里猶綿歲時祀娟然珠翠照羅帷
兩兩女巫歌舞起短簫咽鼓相喧啾迴風吹入楚雲愁
楚雲為雨幾千里似洗重瞳垓下羞山河百戰雄圖喪
顧妾何勞悲玉帳寶劍臨危妾自裁素心不貳君應諒
願從躍馬出重圍艱難又渡淮西涯終將血染原上土

空餘碧草春離離我憶從軍經此地南公慷慨言遺事
香魂一斷招不來今日荒祠堪重哀

羊腸坂歌

太行山天井闕闕南闕北脩坂盤略似羊腸百里千萬
折縈巖絡嶂曲穿懷澤間澤州城南崗阜擁萬牛服箱
難引重絕厓黑入河底深奇石鐵積坡頭竦振衣控板
上青天時聞嘯虎兼啼猿雄峰四嶂日色薄大樹羣撼
風聲寒當闕有廟何丹碧魯叟西來遊晉國一聞簡子

殺賢臣從此回轅餘轍迹
仍墻瞻仰重低徊輕車礚礚
行崔嵬白雲在望親舍遠
翠華入想鑾輿來聊憩松亭
足清曠塵纓淨濯寒泉上
遂飡梨栗度星軺更挽藤蘿
到橫望橫望何所見天地都
蒼茫大河云云通碧漢旭
日杲杲生扶桑分明梁衛開
原陸蕭瑟烟蕪連黍稷荆
榛自上信陵墳萊竹誰歌武
公德拄劒微吟氣慘悽
前登碗子城巍巍失路深
憐阮校尉摧輪大笑曹征西
何如晉王今就邸並駕四牡
安無危蹄輪相踵日南北關

吏獨問余奚來我本石門雲卧叟偶客山東轉山右堯
舜之化雖寂寞追尋禹跡聊奔走蟋蟀號寒再在堂却
隨鴻鴈向南翔此行周覽太行了忽來俯睨黃河陽河
陽自是形勝地天生許公才德備公乎去矣梁木隳落
日軍懷一長喟

海昌築城行

海昌之城城海許屹為錢塘之北戶行人但觀形勢雄
焉識居民徭役苦吾聞役民初省撤連夜下謂非築高

城無以保寧宇爾民不敢康服勞向官府東城樹羽旗
西城伐鼙鼓千夫鑿山石萬夫抃海土日未出已登埤
日既入猶削屢築得周遭百雉完臨平山水半為杵天
公有眼不下顧隳爾新城旬日雨城隳亦何害王事終
靡監城官來校工勤工賞慢工怒程期既畢民安堵浙
河之西城似虎城外妖狐應慄股城中編民誰敢侮君
不見王師昔南來奮擊如霆雷高墉絕壘俱擘開乃知
設險不足倚以德為藩堅莫摧嗚呼海昌之城城新作

落日重門閨擊折

翫月行

悠悠異鄉人望望故鄉月
四十二迴天上圓迴迴見月
歸心折我家高堂臨海城
阿母向天看月行月行若照
兒行處應念白髮增新明
少婦持盃月中立勸姑賞月
還暗泣良人在遠婦獨眠
洞房月冷如黃泉尋常有月
誰不看別離看月情始見

馬陵行

客行忽不樂停車馬陵間上有悲風古樹之蕭瑟下有
哀壑流水之崢嶸陰深壞道餘古雪蘄巖兩壁堆積鐵
石面苔封勁箭痕草頭露滴將軍血青熒燐火黃昏明
呼號水魑啼山精應羞刎頸償斷足此氣千載真難平
西流沂水東滄海勝負孫龐兩安在為提寶劒舞尊前
落日雲霞射光采

五言律詩

次韻送周府引禮舍人崇德程原道奉使入越

買茶北還

萬山盤鏡曲雲憂馬頭飛殺雨春芽摘東風使節歸吳
鄉歌揀萼梁苑賜朝衣還念烟霞客聽鶯獨掩扉

淮海懷古

淮陰訪韓信海上弔田橫相去四百里青山接故城風
塵孤客淚義勇二豪名倚劍哦前史中陽太不情

登東萊郡城樓望海

賜谷知何地東萊倚郡樓日華鳴海夜沙色靜天秋徇

祿寧無耻歸田可自由望中三島近便欲附仙舟

將往齊郡別相知者

佳期定何許遠別在於今去路隨歸鴈幽懷托素琴春
波揚子濶雲樹穆陵深相望餘千里瑤華好寄音

既至濰州寄同考禮者膠西張紳士行上元楊
翮文舉吳郡錢遠伯行鄭元長卿嘉陵楊基孟
載吳興牟魯仲望燕山翟汾文中東嘉余堯唐
臣諸暨姜漸羽儀余上虞謝肅凡十人皆自浙

西而望至南京者也

西戰重城波諸公此日危忽收文苑士同草聖朝儀一
死非余惜孤生念母慈故鄉瞻望遠愁絕鬢成絲

五言排律

洪武十年余自越中北走燕南西度太行寓并
汾南取道於覃懷絕河汴江淮以還蓋太行東
西咸歷矣乃作太行山五十韻

宇宙尋陳迹山川考夏書遂浮天塹筏來駕太行車修

坂雲端走高峰石上驅岩堯赴修武綿亘達幽都既接
恒山峻仍臨碣石孤大河三面帶滄海一浮孟天井闕
雄壯羊腸路鬱紆八陁天設險九塞地呈圖河朔元為
脊星躔恰應樞陰陽鍾秀異土壤劇膏腴五穀資民食
羣材副國儲蕭森羅杞梓卓犖挺杉櫟檜柏參天直槐
榆向日敷隰原紛黍稷畎畝雜稂稊牟麥先秋刈蔓菁
冒雨鋤翠叢分韭薤碧蔓引瓜壺豈但羣蔬圃由來衆
藥區人參供土貢國老應時需苓產松根美脂生石裏


濡青應麤核療嗽必歎冬除參錯梅桃樹崢嶸橡栗株
霜梨包水碧露棗濯珊瑚百谷喧啾鳥重淵撥刺魚磨
牙衝楔猱過跡看於菟水客頻來往青猿或嘯呼陽坡
奔鹿豕叢薄隱熊羆動植皆云遂躋攀敢憚劬哦詩泣
山鬼岼憤似仙儒流水鳴焦尾晴虹拂湛盧蒲萄微醉
了杞菊飽餐諸草茂眠歌藉泉香渴屢斟白雲生絕壁
古雪積深渠環塢疑城郭回崖夾道涂炕烟多燠寢陶
穴盡安居生齒何其衆淳風慎莫渝觀遊吾豈倦行邁

僕將痛漫爾窮朝夕悠然念古初懷襄存禹績左右奠
堯墟周獵登千騎秦徭塞萬夫蕭王踰射犬漢祖距飛
狐魏武摧輪恐文皇扼竇謨陘兵楚王信晉甲季司徒
出壘曾戲史臨沘更斬餘飛揚皆自此形勝定何如聖
主家天下蒼生率海隅茲山鎮中域為國壯方輿偶踏
烟霞表聊將意氣舒揮毫余解賦好事孰言迂始怪夸
娥負終尋李愿廬烏巾白羽扇放鶴向天衢

江陰江舟中次錢塘趙用行韻

風流白面郎生長古錢塘麗賦千金直雕弓二石強上
堂辭父老謁帝入明光玉醞初筵賜官衣內使將萬言
論至治一德頌興王共擬龍騰劒邦知驥服箱高才憎
命達薄宦幸時康試鼓琴三疊仍傳酒一觴早鶯啼野
館獨燕掠雲檣江壑雄南紀河流帶北方雨晴闌樹碧
天濶海山蒼浩浩登長路悠悠別故鄉王程知有限民
社視如傷養爾風鵬翮終當九萬翔





密菴集卷二

欽定四庫全書

集部

密菴集卷三

四

詳校官太僕寺少卿_臣李廷欽

中書_臣劉源溥覆勘

謄錄監生_臣孫永治

謄錄貢生_臣吳士英

欽定四庫全書

密庵集卷二

明 謝肅 撰

七言律詩

韓信城

淮流浩蕩楚原平
嘆息英雄不再生
天日可明歸漢志
風雲猶似下齊兵
千年城郭名空在
百戰山河姓幾更
還將將軍一盃酒
黃鸝碧草不勝情

青州即事

東秦兵後半荒村尚覺遺黎可自存
秦子酒醇終日醉
木棉衣厚一冬溫
炊煙入炕家家榻刺棘苦牆處處門
便擬卜隣依朴俗共栽桑棗滿平原

太行

尋山不遠數千里始向羊腸見太行
羣嶂北連恒岳翠
衆流南赴大河黃
已知天地凝元氣欲嘯雲霞俯八荒
它日向平家事了不惟五嶽恣游翔

太行絕頂

千里驅車陟太行秋風高拂鬢絲涼關當天井聞靈籟
路出羊腸繞大荒廣武西連關陝近黃河東合泗淮長
野夫不盡清游意緩節吹簫坐石床

登常熟極目亭

虞山積翠橫東海上有岌嵒極目亭井屋雞鳴穿曉靄
石潭龍影落秋冥風迴江塹飛濤白天入蘇臺遠樹青
何處言公餘故宅畫橋綠港眼偏醒

士子三月二十日送徐性恭往濠州省親乃翁

季子先生

再見東風草木蕃
老親猶自隔淮村
關山千里不能覲
天地一身何可存
夢蝶坊深趨曉寢
乘龍洲近侍春尊
為言別後長相憶
愁聽啼鶯倚碧軒

宋內門

何處前朝虎豹關
海鱗橋上兩斑斑
落花暮逐流觴水
芳草春迷疊石山
列帝玉魚孤塔底
梵王金構夾城間
空餘往事南人說
泛海龍舟斷不還

過劉則敬五疊山房聞鶯

五疊山陰坐石床，愛聽黃鳥韻笙簧。
東風急處野花落，小雨乾時綠樹涼。
伐木敢忘求益友，携柑長憶醉華觴。
祇今髮白風流在，細詠綿蠻重慨慷。

泗州

暫艤戈船上，泗州兵餘城郭似荒丘。
楚山猶是東南冠，淮水何為日夜流。
斷砌落花官舍靜，夕陽歸燕點堂幽。
春光如此非吾土，擊筑尊前感壯游。

舍弟原仁以驢車自太原來迎我於真定

我寓恒陽餘十日青驂方逐小車來即呼嚴老裝書冊
仍別劉郎把酒盃趙國新封滹水險淮陰故道土門開
太行遮莫高千仞不到河東豈浪回

洪澤

東流澤受羣流廣遠近雲飛倒影過萬古蛟龍深處有
太陰雷雨四時多牙船實欲通肥水錦纜虛疑轉汴河
會整廢田重灌溉楚農齊唱有年歌

武夷山

南下閩關紆使節，武夷幽事忽相牽。
幾重山翠啼猿外，九曲溪流釣艇前。
俯仰此身驚寵錫，飛行何地覓神仙。
玄都熟煮金芽飲，注目豪鷹揆海天。

寓莆田分司望壺公山

山上有道觀

平地仙山起碧空，虛疑日月挂壺中。
金壇一片桃花雨，瑤圃千株荔葉風。
四海無波知獻雉，八閩有獄愧乘驄。
細論吾道裨皇治，最憶邦人夾漈翁。

鄭夾漈先生作通志畧凡四十餘書

皆為朱文
公所推重

壺公山懷舍姪惟昇

在興化府作

驄馬西臨莆口大一山千仞卓崔嵬
泉當絕頂通朝夕
日轉壺中照殿臺
弭節偶然觀海去
省風寧為覓仙來
還憐鬚鬢都成雪
家姪何時共酒盃

井陘道中中秋值雨

青石嶺頭涼夜坐
仰天不見月光開
陘山雷起楚王廟
綿水雨來娘子關
遠道著鞭心骨折
幽房織錦淚痕斑

終尋花萼卑棲處太谷誰云隔萬山

寒食出遊

鳳山騫翠拂晴霄寒食騎驢過野橋翁仲新墳簫鼓怨
秋千深院綺羅嬌忽驚錦字書緘斷堪望白雲親舍遙
滿眼客愁何處遣杏花雨色上春潮

送戴先生應詔

束帛加金貴海鄉特舟千里上龍江天光照人尺五近
文氣凌雲萬丈長善走宛駒歸漢苑和鳴岐鳳識周岡

定知黼黻皇猷日金水河春細柳黃

下邳待月

萬里吳船泊下邳秋風短鬢欲成絲孰無韓信酬金志
已後張良進履時河水東遷非禹跡嶧山西峙尚秦碑
鱸魚黍酒沙頭辦今夜如何月上遲

送行人蔡英夫奉旨頒琉球國王印寶就與國
王之來享者二人同駕海舟自福建起柁

五虎門西疊鼓撾行人承詔自皇家刻金鳥篆頒王號

建節龍驤戛海霞兩國夷君歸絕島萬年天子御中華
預知奉使旋京日浩蕩秋濤湧月槎

大王峯

大王峯起壓羣山想像臨朝碧漢間城郭樓臺餘刻畫
煙霞猿鳥足高閒正思問俗紆鞍馬難逐飛仙振佩環
九曲棹歌聊自唱天風音節動閩關

長安壩

海寧州西來往頻長安壩上最傷春東風桃李非無主

歸燕樓臺不見人
天未雲帆隨望遠
雨餘江草喚愁新
故鄉門巷干戈底
越客相逢話是真

題張建封擊毬圖

擊毬嬉戲動三軍
乘勢奔馳若有神
但見馬頭飛閃電
不教杖底起纖塵
鳳笙仙樂從歸遠
燕子雲牕倚望頻
一代忠賢張僕射
莫忘天子動行春

挽王豫齋先生

槐樹生陰晝滿庭
風流儒雅想儀刑
養親固已營三釜

教子還能受一經四海交遊如昨日百年耆舊見晨星
東風忽斷人間夢愁絕西原草色青

老母生朝

朝來佳氣滿湖堂喚婦升堂奉壽觴八表慈親顏色好
中年季子鬚毛蒼烏憐梅熟啼高樹龜愛荷新躍小塘
願得日長如化國永宜孫子樂無央

送梁典史朝覲

皇治無為自有聲淪淪歌頌獻時平四方海岳安坤軸

八表皇辰榮帝清民在鄉閭真力土士游庠序必明經
參軍暫主芙蓉幕便奉天書報政成

送浙東憲使陳天祥歸永嘉

送客臨江小小亭官梅華發酒初醒舟前浪起蛟門白
馬首風回鴈蕩青進食吏人趨傳舍牽衣兒女拜中庭
會令憲法行東國三尺銛刀始發硎

題雙猿圖

重重老樹絡蒼藤空際飛行應此生江月白時同發嘯

峽雲昏處總無聲持環欲向何人獻試劒真教處女驚
千載心期如一日不知人世別離情

介休李貫道以安東知縣聽對于西山布政司
與余同寓太原右衛知事劉景高所其還所治
也詩以贈之

李侯與我生同年解后汾陽覺汝賢半夜談詩燒絳燭
東風把酒問青天河山景物輕車外淮海波濤大艦前
想見邑人迎令尹棠梨樹在綠陰圓

送咸陽知縣莊九疇之官

暫時學校出淮村一日瞻天入午門
又向清朝紆寵命可無佳政及黎元
錦波揚子浮春色綠草秦城沒燒痕
莫惜此行千里別惟應思答主人恩

送陳德原之瓊州寧遠縣知縣

承恩忽領丹符出作宰遙臨瘴海南
瓊島一隅為地窄邑人強半與黎參
石船停浦長浮浪吉貝盈機不事蠶
但使政成邊徼靜釀椰為酒且須酣

次韻徐季子北平道中

馬首參橫夜已闌，燕山翠削露初乾。
雲連郭隗金臺峻，風蕩荆軻易水寒。
西楚間居前日夢，清河遺愛後人看。
朔南何處非王土，仗劍毋勞畏路難。

海廟

神龍宮宇俯滄溟，變化無端善赫靈。
每作時霖蘇后土，又頒王號出彤庭。
天連萬里長沙碧，日照三峯絕島青。
亦欲攀鱗游八表，仍嗟踪跡似浮萍。

寄龍泉長老岱宗兼簡白雲禪師

招提城裏俯崔嵬金策爭看步步綠苔龍影曉隨岩雨過
鯨音夜送海潮來茶煙颺鬢歌禪榻蓮社違盟把酒杯
早晚相尋白雲老雄文奇句與同裁

次韻具庵大璞和尚奉旨還杭之南天竺夕佳樓

三經成註天顏喜一詔還山白髮疎疎捧籙每霑春殿酒
賜金惟買曉盤蔬南高峰翠分羣嶂西子湖波合衆渠

誰悟夕佳樓上意摩尼即是本來軀

次永樂寺歸庵長老見寄韻

寶坊千仞俯層空定起龍山第幾重
一筆妙書連翥鳳五弦清響送飛鴻
化行日本朝唐帝藥煉丹砂伏葛洪
坐我寸田寬似海等閒擒得火中龍

送翱天碧住蕭山淨土寺

羅刹江東寶地幽袈裟獨上木蘭舟
青山玄度同深隱采筆文深結勝遊
雙樹吹香連竺國雜花飛雨洒皇州

道心何處非清淨
雪裏芭蕉海上鷗

龜山

天際清淮春浩蕩
雲邊故堞暮崱峩
佛狸百戰鉤車卻
水獸千年鐵鎖沉
舉網老漁沿碧浪
維舟孤客蔭青林
勝游誰在坡仙後
滄海中原感壯心

狼山晚泊

巨鼇翻動蓬萊石
五朶芙蓉落楚天
過海每來青鳥使
渡江重駐白狼仙
雲霄鷁影旋孤塔
風雨龍吟出九淵

閒覓舊題看歲月滄波老樹暮崖前

題呂繼道運使乃父孝感詩卷

玄學窮探心切至先祠追孝涕洟瀾天教金鯉方騰井
人報青牛已渡關異事昔聞淮水澳新圖今見淝江灣
賢郎喜得醴臺使忠孝高風不可攀

次舍弟忠過思南望鄉崖韻

五溪風俗共雲山王化漸摩古所難綵服洞氓雙脚健
雕鞍使者赤心彈望鄉崖峻雲飛白鎮遠溪深瘴草斑

自是成名須努力男兒休恐不生還

望臺

高臺突兀俯晴空漢主旌旂在眼中
西倚太行寒翠重北臨滹水碧波通
乾坤再造中興業日月長懸佐命功
誰料雲臺圖畫黯依然魏闕起奸雄

逍遙臺

逍遙臺倚青天外玩物何須與物齊
出水游魚觀未了穿花飛蝶夢先迷
悠悠蒙縣間雲近渺渺濠梁落日低

若得先生從說劍乾坤容易息征鞞

歌風臺

秉鉞歸來士若林登臺何故泣沾襟應緣信布成梟首
可但風雲感壯心天入碣間佳氣盡亭臨洒上碧流深
大風章在誰歌得擊筑兒童振楚音

姑蘇臺

鳥喙含羞還故國蛾眉揚笑入深宮龍舟夜醉天池月
仙樂秋傳桂苑風錯料敵讎難遽復那知霸業易成空

層臺景物如前日麋鹿自遊春草豐

滹沱早發

小車欲發候鳴雞榆柳參天路不迷
斗柄正垂滹水北月輪將落井陘西
九霄健鵠曾傷翮萬里神駒敢散蹄
忽見戍樓紅日上却觀瀛海躡丹梯

題柳機仲所藏明皇躍馬圖

開元天子騎龍馬來往驪山及太平
華萼樓中張五幄集賢殿裏校羣經
不疑野鹿銜花卧却跨青驄首蜀行

治亂有機如反手請觀臣結頌中興

長至

又見一陽生仲月誰知獨客最傷神天涯霜露深先墜
塞上千戈隔故人無酒步兵仍似醉偷金曲逆豈憂貧
唯應天意同人意欲放梅花樹樹春

瞻嶧亭次歐陽圭齋韻

黃棟河西一草亭嶧山相對兩峯青雲浮魯觀無今古
石刻秦文似日星游子臨流方歎逝醉翁行路已勞形

亦知仁者偏多壽何必丹丘住福庭

紫溪道中

屬鉛山

飛傳清晨度紫溪橫空橋閣絕雲霓微波岸芷金鱗躍
細雨山櫻翠羽啼北望帝鄉天咫尺南踰閩嶺路高低
皇華最感旬宣意弭節遲回大樹西

謁朱文公祠詩

在漳州府開元寺北登高山趾西北城下陳北溪黃勉齋配食

太守祠堂倚翠岡坐間龍象是陳黃草生書帶祇園裏
樹蔚甘棠瘴海陽川岳何年如帶礪墉壞終古似金湯

邊氓得離干戈苦一飯猶應祝聖皇

入土門

在獲鹿縣

獲鹿城西第五陁土門岌業倚青冥秦皇何可塞行路
漢將偏宜出勝兵地勢雄高臨趙魏民風豪俠帶幽并
鹿泉一曲如流玉為坐苔磯自濯纓

至泉州府決漳州衛獄寓分司作

莫道泉南非要地遙從海外控諸夷雲濤大舶來犀象
烽櫓雄城駐虎貔正擬觀風敷帝德先應決獄示皇威

此時若有民愁嘆按部深慙著繡衣

龍舟谷

在祁縣北關

北辭太谷孤城遠南出盤陀疊嶂稠天作崇關紆鳥道
水渟深谷漾龍舟離離坂黍垂秋實嘹嘹邊鴻送客愁
萬里歸軒何日到胡桃陰裏飯吾牛

浙江亭漫興

樟樹孤亭望會稽煙波浩浩使人迷此身漂泊半天下
雙淚潺湲盡浙西鴈起長汀秋葉脫鶴歸華表海雲低

典衣也就壚頭飲欲寄鄉書醉懶題

題天風海濤亭詩三首

并序

洪武十八年春二月十九日余與右參議楊
從道自漳郡還過福之鼓山登天風海濤亭
因作三律其一寫登臨之極目以致望京之
意其一用先師尚書貢公玩齋所詠詩一句
為起以仰止于公且東清源禪師其一序崖
壑勝處聞鐘鼓之音知大士初度而羣僧贊

歎也

全閩喬岳此第一誰作孤亭俯八垓風自天東吹日出
濤從海上挾雲來振衣千仞知猶健持節重臨愧不才
回望帝京當北極紫金佳氣護蓬萊

天風亭榭玉芙蓉臨眺令人憶玩翁萬里乾坤春浩浩
八方川嶽日融融為尋陳迹紆驄馬錯料深淵應蟄龍
佛國有珠懸白日光華無處不圓通

風濤亭下萬山低度壑緣崖信杖藜杜若波澄池鳳浴

枕柳月皎峽猿啼靈源有物雲應護大頂通霄路不迷
誰頌觀音初出世鏗鐸鐘鼓石門西

九月三日山堂桂花經雨而落慨然有作

桂樹花開礪水南花時無奈雨淅淅田風散漫天垂粟
初日蒼涼地布金漢武館中猶賸馥月娥宮裏更清陰
誰知楚客淹留意寧與山猿自在吟

次汪僉事登北固樓送同年僉事之各府州縣
分治韻就送朝京

新我豸角總英儔京口同登北固樓日月麗天鍾阜近
風霜捲地浙江秋勅書按俗乘驄馬旄節還朝駕鷁舟
自古長才宜大用太平功業煥皇猷

遊石塘東魏必聞并劉則敬

回風蕭槭振林舉滿耳商聲起繹騷遠水微茫江浦斷
浮雲窈窕石門高百年蠟屐隨雙足九轉丹砂換二毛
與爾逍遙人世外時來臨海掣靈鼇

劍池

已聞神劔千年化空俯靈池十丈寬泉脉尚通江海潤
龍光曾照斗牛寒飛梁背負層樓重老樹根將墮石蟠
一嘯蒼崖回殺氣未容仙鬼詠悲酸

二月五日蘭溪道中廉使陶公俾作一律并呈
副使費公僉憲何公同一是正

大溪夾岸萬山青官舸乘風五兩輕百粵分符新部使
太微執法舊明星歲當甲子天時泰春滿乾坤聖化行
喜得同寅俱俊傑願持綱紀贊昇平

六月二十五日按察使陶垕仲僉事謝肅為糾
劾左布政薛大方貪淫等事既奏准令按察司
就行取問彼亦造謗還詞有旨都取赴京於都
察院聽對肅與垕仲將出福州城城中老稚莫
不哭送詩以記之

幾行飛奏九重書一使追回萬里塗炎熱可能捐素扇
清冰元自貯寒壺氣隨虹蜺橫南極夢挾風雲入上都
照見忠邪皇鑒在爾民何用哭行車

萬安橋并序

萬安橋一名洛陽在泉南之晉江惠安二縣之交宋端明殿學士忠惠蔡公襄守郡時所造東西皆因山麓為趾長三千六百尺跨洛陽江上潮汐吐吞洲島環映可謂奇勝而橋趾西北公祠在焉祠中對樹碑版者二蓋公自記其作橋歲月并大書而深刻者字體宏壯不在唐顏真卿灘灘記下是亦奇勝也洪

武甲子春三月肅乘傳決獄於泉過橋讀碑
摩挲偉畫契揮翰之神顧視成功獲涉川之
利夫是以再拜公像低徊不能去覽其奇勝
詠之以詩

萬安橋在泉南郡驄馬來時踏
嶽茫羣柱直排滄海浪
夾闌橫截洛江陽荔花洲島春風暖榕葉亭臺曉日蒼
浩想蔡公能濟險轉因驅石笑秦皇

亞父塚

漢楚知誰與國謀中原爭鹿幾時休功成竟屬三人傑
遺恨空餘一土丘寶匣龍泉還見發鴻門玉斗不須留
繫舟太息英雄事戲馬臺前大樹秋

硤石山

淮甸西頭尋禹跡維州硤石見朝曦石從厚地分雙壁
峯合遙天注一門洞泊雨添波浪湧川陂雲接樹林昏
會修故壘防津要不使奸雄事併吞

八月八日纂風觀潮示同會友人

八月纂風風正急合觀海濤如湧山魚龍挾勢地維動
鴻雁流哀天宇閒雲斷禹峯浮一蓋煙輕吳嶠濯千鬟
揮盃不惜臨流飲要使陽侯識醉顏

浙江觀潮

落木無邊江岸開巨濤排入海門來勢連吳越奔千騎
聲撼乾坤鼓萬雷帝飛龍何日返伍君白馬蹴雲迴
客懷對此真悲壯且飲樟亭酒一杯

七月十五夜太湖看月

震澤早秋秋月明老夫此夜頗關情三千餘里出閩海
七十二峯看洞庭滉漾金波浮大地淋漓元氣濕青冥
茫然錯料鴟夷子到載西施一舸行

甲寅六月十五日夜蓀溪書舍玩月有懷任魯
民先生時任已逝

懶婦山高湖水深狂夫遙夜發清吟臨流團扇颺荷氣
玩月胡床轉樹陰聊適灌園今日意敢論經世百年心
乾坤俯仰相知少愁對朱絃振古音

釣臺

南征屢泊桐江船想像高風灑九天二十八將豈吾侶
一千餘年無爾賢使旆已承堯日照釣臺難覓客星懸
最憐碑碣生苔蘚俯仰雲山重慨然

遊武夷

武夷曾向丹青見今日經遊意豁然花貌雲中來玉女
棹歌溪曲過儒仙欲從注易煙林表正擬觀風瘴海壖
矯首峯巒千萬狀月華明處有啼猿

題邵允直所藏會稽山水圖

宛委之山三百里碧峯無數落青天藏書軒帝知何在
望海秦君竟不仙老鶴自淘沙底箭神龍長護井中錢
舊遊咫尺丹青裏欲棹春波載酒船

送王允誠任咸陽縣丞

龍江楊柳拂春煙扣贈新條作馬鞭寶劍有光終貫斗
大珠脫翳豈沉淵入關縱涉三千里見日須瞻尺五天
曠代聖恩何以報應同黎庶祝堯年

送喻士文之柳州馬田縣丞

丹符佐邑龍城去金闕曾為論治人解聽簫韶知聖德
好將冠冕化文身公庭榕葉鶯聲巧江水楊花鷁首新
公退從容詢往事羅池碑刻浣苔痕

金陵懷古

霸國江山天下壯興王人物向來稀花餘吳苑迷仙仗
柳拂陳宮見舞衣北府駐兵猶昨日中原轉戰幾斜暉
自南甌北歸真主六代空慙事業微

雙廟

在呂梁西崖上
祀關將尉遲恭

山盤河激呂梁崇遺廟西崖祀兩公義勇壽亭扶漢社
勲勞鄂國佐唐宗吳興兼載麗牲石徐土長存治水功
乞我安然上流去滿帆蕭颯更南風

盱眙

長淮清泗東南濶第一山當碧漢橫勝地幾回經戰馬
客舟千里聽啼鶯波濤晴動僧伽塔草木春深義帝城
天際汴河來衮衮陳留遺俗最關情

自平定至壽陽

平定城西東曉裝黑沙山外度連岡斷碑古木雲長廟
絕壁懸蘿石佛堂白雁天晴聞遠唳黃花霜重見孤芳
悠悠故道風塵靜馬上看山過壽陽

雨中獨坐有懷滎陽道中用灰字韻

山色秋光淡繞齋雨聲蟲響互相哀清尊憐我攻愁去
白髮欺人送老來江柳靜無餘葉在池蓮遲有一花開
馬蹄却憶成皋路野燒西風滿面灰

欽定四庫全書



家範
卷三

密菴集卷三